

Edizioni

- letto 587 volte

Aston

Gaucelm, diguatz m'al vostre sen
qals drutz ha mais de son plazer ?
cel c'ab sa bona dona jai
tot'una nueit e non lo fai,
ho cel qui ve a parlamen
e no a lezer gaire
mas quant d'una vetz faire
e aqui meteis torna s'en.

Peirol, al meu conoisemen,
sel, c'una nueit hi pot jazer,
deu ben aver dos tans de jai
que sel qu'o fai e pueis s'en vai;
qu'el jazer ha plazers tals cen,
s'es qui be·ls sapcha traire,
q'inz es meiller amaire
qu'el fait c'om en tal cocha pren.

Gaucelm, ben ha gran espaven
aqueu qu'es en autrui poder,
que trastot'una nueit i jai
de lonc cella que plus li plai
e non pot aver son talen
ni sa voluntat faire;
donc trai negus pecaire
ins en enfern aital turmen.

Peirol, molt vos razonatz gen!
Estiers d'amor no faitz parer
qu'en sapchatz tan con ieu en sai.
Dizetz c'om ab sidons mal trai
abrassan e baissan soven;
segon lo mieu veiaire
non es cortes amaire
cui tals maltrairtz fai espaven.

Gaucelm, aisi non a conten.
C'a dreg lo poscatz mantener
si·l faires non es, quant s'eschai,
totz los autres plazers desfai.
E qi recep son joi breumen
en abans que repaire,
aquel jois don es laire
li dura pueisas longamen.

- letto 535 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/edizioni-47>